

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Cheng vbc 10 senga Thenzawl khawpui cheimawina leh siamna tur Thenzawl Peace City Master Plan chungchang meeting Chief Minister Pu Lalduhoma hova neih a ni.
- 2. Assamah tuilian avanga harsatna ala ziaawm thei lo
- 3. Parliament fur thutkhawm chu thlaleh July ni 21-ah tan a ni dawn

<><><>

THENZAWL-PEACE CITY

Cheng vbc 10 senga Thenzawl khawpui cheimawina leh siamna tur Thenzawl Peace City Master Plan chungchang sawihovin vawiin khan Chief Minister Pu Lalduhoma hovin a kaihhnawih mi pawimawhte an thukhawm a,

Thenzawl Peace City hmalakna hi Aizawl khawpui tawt lutuk tihziaawmna leh Mizoramin khawpui changkang zawk a neih theihna tura Chief Minister Pu Lalduhoma hmalakna a ni a. Mawhphurhna a lak tirh atangin Central sawrkar thuneitute vawi enge maw zat a sawipui tawh a ni.

Meetingah hian Chief Minister chuan, Thenzawlah hian tuihna tha tak tak a awm nual a, furah phei chuan chenna in te a chim hial thin tih sawiin Master planah hian khaw lailia lui mawi tak, dil nalh tak leh a chhehvel ram mawi tak a awm ngei tur a ni a. Sawrkar hmunhma, nakin zela la chhawr tangkai tur ruahman a ngai bawk ang a ti a. Tlang rama plan city, mawi leh khualzin hip tak, chenna atana duhawm si - ruahman ngei an tum dawn a ti.

Tunah hian Thenzawlah hian mihring singkhat vel cheng anga ngaih a ni a. Ram Sqkm 108 huam chhung velah plan hi siamin, urban area bik chu Sq km 82 ang vel tura chhut ni ta se; mipui bit zawng hi 100 persons per hectare a nih chuan mipui nuaih sawm vel chu thawl nuam takin an khawsak thei tur a ngaih a ni a. A tul anga tihlen chhoh zel theih a ni bawk ang.

Agency rintlak leh hmingtha ngei thlan tum tlat ni se an tih bakah sawrkar atanga peace city buaipuitu tur bik Special Purpose Vehicle pawh din a rel bawk.

Meetingah hian UD & PA Minister Pu K. Sapdanga, Chief Secretary Pu Khilli Ram Meena leh official pawimawh te an tel a ni.



WORLD ENVIRONMENT DAY

World Environment Day chu naktuk June ni 5 hian khawvel hmun dangte rualin Mizoram pumah “Beat Plastic Pollution” tih thupui hmangin hman a ni dawn.

World Environment Day kumina thupui hi kum kalta a plastic in khawvel a tih buai nasat vanga Plastic atanga khawvel chhan chhuah na lam hawi a ni dawn a, Aizawl Divisional Forest Officer Pu Lalnunsanga Khawlhing chuan Akashvani palai nen an inkawmna ah Mizoram ah boruak a thianghlim bakah, khawlum lutuk leh te khaw vawt lutuk te chu Mizorama chengte chuan an la tuar lo a ti a, hei hi Mizoram vanneihna ani tih sawiin humhalh uar a pawimawh a ti.

Pu Lalnunsanga Khawlhing chuan tunhnaiah Mizoram ramngaw hrang hrang a chereu tih sawiin ramsa leh nungcha tam tak pawh an chereu mek a ti a, humhalh an ngai takzet tih sawiin sik leh sa inthlak danah ramngaw humhalh loh chu tuar thei anni tih sawiin mipuite tanrual a pawimawh a ti a, sik leh sa inthlakah natna pung thei a tam phah tih sawiin heng laka him theihna tur chu ramngaw leh nungcha humhalha tih chereu loh ani tih a sawi.

Khuarel thil inthlak chu tlansan theih a ni lo ati a, ram pakhat tana hlauhawm bik nilo in, khawvel ram zawng zawng in environment inthlak chu an tuar thin a ti a, Mizoram ah tuilian tak emaw hmun danga nasa taka a thawh ang tuar lo mahse heng hun awmdan inthlak in natna a ken tel chu tuar thei an ni a ti a, invenna tha tak an neihloh avangin eizawnna leh mihring hriselna nghawng thei a tam avangin ramngaw humhalh chu tih makmawh a ni tih a sawi.

Aizawl Divisional Forest Officer chuan Mizoram ah July 2022 atangin hman khat daih plastic hman khap ani tawh a ti aa, duh ang in hma a sawn lo tih sawiin hei hian chhiatna tam zawk a thlen thei a ti a, thingphun lam uar deuh tur leh mi tin te khuarel in a ken tel ngaina tura chah in Mizoram boruak thianghlim tak chu ngaihhlut a pawimawh thu a sawi a ni.



BANA KAIH INNOVATION CHALLENGE

Sorkar auhla Bana Kaih hnuiaia state pum huap thilsiam chhuah intihsiakna Chief Ministers Innovation Challenge a lawmman dawngtute hnenah an bultanna tur hlanna vawiin khan Chief Ministers Conference Hall-ah Chief Minister Pu Lalduhoma hova neih ni.

Thusawiin Chief Minister chuan, kan pi leh pute hun atang tawhin hmanrua tam tak an lo hmuchhuak ve tawh a. Herawt te, Hmui te, Puantahna te leh thil dang dang. An technology pawh kha a lo sang viau mai. Thangtharte hian anni aia tha leh changkang zawk hi an la siam hlei thei lo zawk ten a lang a ti a. Darkhuang thar te, dar thar te hi kan siam leh tawh chuang lo reng reng a. Thangthar fing zawka ngaihte tan lak a tul hle a ti.

Thil thar hmu chhuaka, siam tur hian lekhathiam nih a tangkai rualin, lekhathiam lem lo inventor ropui tak tak hi khawvelah tam tak an awm tho

va. Miin hmanraw tangkai leh mihringte tana tangkai siam a duhna, midangte tanpuitu nih duhna, awlsamna A thlen thei thil thar hmuhchhuah duhna zawk khan inventor-ah mi A siam thin. Chutiang rilru pu mi chu tam deuh deuh se an duh a ni.

<><><>

OCULAR TRAUMA

Aizawl Civil Hospital-a Eye Dept a Head of Dept Dr Lalhuthangi Hmar chuan mit enkawl uluk a pawimawh tih sawiin mita bawlhhlawh a luhin nuai mai loa tuia fai taka sil a pawimawh a ti.

Dr Lalhuthangi Hmar chuan mit hliam palha thi a chhuak anih chuan doctor pan vat tur a ni a ti a, mitmu dum hmaa mit dathlalangah bawlhhlawh a tang a nih chuan doctor pan tur a ni a, rei rial loh tur a ti a ni.

Hliam a awm hrim hrim chuan tihfai a, a theih chuan antibiotic eyedrop, thingtlangah chuan gentamycin eyedrop tih te a thlawr theih a ni a ti a, superglue ang chi te chu sil bawrh bawrh tur a ni a, mahnia enkawl tur a ni lo a ti a, heng bakah hian Grinder leh Welding khawih zingah thir them a lut duh thin tih sawiin fimkhur a ngai hle a ti a, hengah hian mit chu nuai mai lo tur leh tuia sil fai a pawimawh tih sawiin a fiah theih mai loh chuan Doctor rawn vat a pawimawh tih a sawi.

Byte...Dr Lalhuthangi

Mithiam te sawi danin mita bawlhhlawh leh thir them awm hi lak chhuah lohva rei tak a awm chuan mit ulcer a thlen thei a, heng bakah hian tauh palh emaw accident emaw avanga mit meng theilo ten enkawl na tha tak an hmuh theih nan doctor pan vat a pawimawh hle a ni.

<><><>

HOME MINISTER

Home Minister Pu K Sapdangan Kawnpui M atangin Thaidawr tlang pan chhohnaah Mizoram IR te dah a ni ang a ti a, hmalak mek a nih thu MZP hruaitute a hrilh.

Home Minister leh MZP General Headquarters hruaitute hi nimin khan inkawmin, Phuldungsei khua Thaidawr tlang pan chhohna kawng sir a Tripura Sawrkarin Guest House an rawn sak chungchang leh Tripura sawrkar hmalak dan an sawiho a.

MZP chuan, Phuldungsei khaw bula Thaidawr tlang pawn chhohna turah Tripura sawrkar-in Guest House cheng nuai 300 man an sak mek thu leh, Tripura state rifle-te an duty reng thu an an hrilh a. Mizoram state police-te pawh duty nghal se an duh tih an hrilh a.

Mizoram chhunga Tripura sawrkar-in buiding an sak mek, MZP-in a ngaimawh em avanga a hmuna an lo tlawh tawh thu sawi nawn lehin, tun hnaiah mi tu tih hriat loh ten an beih hnuah pawh sak chhunzawm an tum leh chu theihtawp a dodal turin Home Minister hi an ngen a ni.

Home Minister chuan, MZP ten ram leh hnam veia a mah an finchhuah thin leh theih ang anga hma an la thin chu lawmthu a lo hrilh a. Tripura Tourism Minister nen an inbiak thu sawiin, Guest House sak chu chhunzawm tawh lo tura hrilh thu a sawi a. Official Level-ah sawiho tura an ruahman thu a sawi.

Home Minister chuan, Tripura State Rifle ten Thaidawr tlang pan chhohna turah Check Gate an lo siam ve ngawt pawh thiat nghal tura an hrilh thu a sawi a. MZP-in Phuldungsei khawtlang hruaitute hnen atanga thu a dawn danin, Check Gate chu thiah nghal a ni.

MZP chuan, Home Minister hmalakna avangin lawmthu an hrilh a, Jampui tlangdunga Mizo mipuite leh Mizoram khua leh tuite venghim tura theihtawp chhuah zel turin an ngen nghal a. Ramri kal pawhna kawngpuite chu tun aia ngaihsak lehzual turin an ngen bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

ASSAM

Assamah tuilian avanga harsatna ala ziaawm thei lo. District 21 chhunga cheng mi nuai 6 sing 3 chuangin harsatna an tawk mek a. Tuilian avanga thi zat pawh mi 12 a kai tawh a. Dawrkar 24 kalta chhungin mi 6 an thi a. Thingtlang khua 1500 chuang tuiin a chim a. Thlai chinna hmun ram hectare 14700 chaung tuiin a chim chhe tawh bawk a ni. State sawrkar chuan SDRF leh NDRF te nen theihtawpin chhanchhuah hna an thawk mek a ni. Asam State Disaster Management Authority sawidanin chhawmdawlina camp 223 ah mi sing 4 chuang an khawsa mek a ni.

<><><>

PARLIAMENT

Parliament fut thutkhawm chu thlaleh July ni 21-ah tan a ni dawn. Union Parliamentary Affairs Minister Kiren Rijju chuan session hi August ni 12 thleng neih a nih tur thu New Delhi-a chanchinbumite a kawmnaah a sawi a ni.

Opposition party ten tunhnaiah Operation Sindoor chungchang Parliament Special session-a sawiho ngiatin sawrkar an nawr nasa hle a. Tun tum hi Operation Sindoor neih anih hnua Parliament inkhawm hmasa ber tur a ni ang. Puan tawh angin Pahalgam-a firfiakte chetnaah khan India mi 25 leh

Nepali mi pakhat an thi a. India sipaite chuan he inbeihna hi chhangletin Pakistan leh Pakistan Occupied Kashmir-a awm firfiak 100 chuang an kaphlum a ni. Sawrkar laipui chuan Pahalgam firfiaka inbeihna chungchangah hian all-party meeting tum hnih a ko tawh bawk a ni.

<><><>

DELEGATES

Sawrkar laipui tirh Parliamentary Delegates 7 zinga palite chuan chu Indiaah an lo let leh tawh a. Shiv Sena MP Shrikant Shinde kaihhruai team te chuan tukin khan New Delhi an lo thleng a. Anni team hian UAE, Liberia, Democratic Republic of Congo leh Sierra Leone te an tlawh a. Vawiin chawhnu khan NCP-SP MP Supriya Sule-I kaihhruai team te an lo let ve leh a. Anni team hian Qatar, South Africa, Ethiopia, leh Egypt te an tlawh a ni.

Puan tawh angina nimin khan team pahnih lo haw tawh bawk a. Heng team te hi DMK MP Kanimozhi kaihhruai leh BJP MP Baijayant Panda kaihhruaite an ni a. Hlawhtling takin an ram tlawhah te Indiain firfiakte a duhloh zia leh a do zel tur thu an hrilh darh a. Kanimozhi team te hian Apain, Greece, Slovenia, Latvia leh Russia te an tlawh a. BJP MP Panda team te hian Algeria, Saudi Arabia, Kuwait leh Bahrain te an tlawh a ni.

<><><>